



Broj: 01,02.03,03/11-05-1-351/18
Sarajevo, 3. 5. 2018.

PRIMLJENO:

Organizaciona jedinica	Klasifikaciona oznaka	Redni broj	Broj priloga
	25-06-2018		

**KOLEGIJIMA OBA DOMA PARLAMENTARNE SKUPŠTINE BIH
ČLANOVIMA DELEGACIJE PSBiH U PARLAMENTARNOJ SKUPŠTINI UNIJE
ZA MEDITERAN
KOMISIJI ZA VANJSKE POSLOVE PREDSTAVNIČKOG DOMA
KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I
KOMUNIKACIJE DOMA NARODA
KOLEGIJU SEKRETARIJATA**

**IZVJEŠTAJ S 14. PLENARNOG ZASJEDANJA PARLAMENTARNE SKUPŠTINE
UNIJE ZA MEDITERAN (PSUzM)
Kairo, 28. i 29. 4. 2018.**

U Kairu je 28. i 29. 4. 2018. održano 14. plenarno zasjedanje Parlamentarne skupštine Unije za Mediteran (PSUzM), kojim je predsjedavao predsjednik Predstavničkog doma Arapske Republike Egipat, **Ali Abdel-Aal Sayed Ahmed**. Na zasjedanju je učestvovala Delegacija Parlamentarne skupštine BiH u kojoj su bili: **Hazim Rančić**, predsjedavajući Delegacije, i **Diana Zelenika**, zamjenica predsjedavajućeg. Na zasjedanju su učestvovali i predstavnici Evropskog parlamenta, te nacionalnih parlamenata oko 25 zemalja članica PSUzM-a.

Plenarnom zasjedanju PSUzM-a prethodio je sastanak Komiteta za politička pitanja, sigurnost i ljudska prava Parlamentarne skupštine Unije za Mediteran, kojim je predsjedavao **Renato Soru**. Soru je upoznao prisutne s dnevnim redom i predstavio Nacrt preporuke „Uloga mediteranskih parlamenata u suzbijanju terorizma i prevenciji nasilnog ekstremizma“. Zatim su razmatrani amandmani uloženi na Nacrt preporuke, koja je usvojena na kraju sastanka.

Plenarno zasjedanje bilo je posvećeno temi: „Suzbijanje terorizma u evromediteranskom regionu“. Usvojeni su dnevni red i zapisnik 13. plenarnog zasjedanja PSUzM-a, održanog u Rimu, 12. i 13. 5. 2017.

Abdel-Aal istakao je da se zemlje Mediterana i dalje suočavaju s velikim problemom nekontroliranih migracija i terorizma, te naglasio potrebu kooperacije mediteranskih zemalja kako bi prevazišli opasnosti i prijetnje terorizma. Smatra da je potrebno preduzeti određene mjere kako bi zaštitili svoje zemlje, a na prvom mjestu su finansiranje, sigurnosna kontrola interneta, smanjenje siromaštva i nezaposlenosti, pružanje mogućnosti mladim ljudima. Također je istakao da se Egipat zalaže za postizanje mira i stabilnosti u regionu, kao i cijelom svijetu. S ciljem iskorjenjivanja terorizma, egipatska vojska je, u saradnji s civilnom policijom, uspješno pokrenula protuterorističku operaciju „Sinaj 2018.“ u nekoliko regija u zemlji, među kojima i na poluostrvu Sinaj, gdje su vrlo aktivne džihadističke grupe.

Jorge Borrego, zamjenik generalnog sekretara Unije za Mediteran, predstavio je pregled aktivnosti, inicijativa i projekata koje podržava Unija za Mediteran u suočavanju s

problemom terorizma, ponovo pozivajući zemlje članice na uočavanje značaja razvoja kohezivne i sveobuhvatne politike koje se fokusiraju na korijene i uzroke nestabilnosti i nejednakosti.

Parlamentarna skupština Unije za Mediteran usvojila je preporuke Komiteta za politička pitanja, sigurnost i ljudska prava, Komiteta za ekonomska i finansijska pitanja, socijalna pitanja i obrazovanje, Komiteta za poboljšanje kvaliteta života, razmjenu iskustava između civilnih društava i kulturu, Komiteta za prava žena u euromediteranskim zemljama i Komiteta za energiju, zaštitu okoliša i vode.

Ali Abdel-Aal Sayed Ahmed predao je predsjedavanje Parlamentarnom skupštinom Unije za Mediteran Evropskom parlamentu, koji će predsjedavati narednih godinu dana.

U ime Antonija Tajanija, predsjednika Evropskog parlamenta i predsjednika Parlamentarne skupštine Unije za Mediteran, obratio se David Sassoli, član Evropskog parlamenta. Sassoli je istakao da je potrebno da, kao parlamentarci koje su izabrali građani, u borbi protiv terorizma, ulože napore da postavljeni ciljevi postanu pravi projekat za koje je neophodno da sve zainteresirane strane daju doprinos. Zahvalio se na ukazanom povjerenju da Evropski parlament preuzme predsjedavanje Parlamentarnom skupštinom Unije za Mediteran. Smatra da je vrijeme da mediteranski parlamenti vrate pokretačku snagu i doprinesu jačanju projekta euromediteranske saradnje. Kao što je već poznato, fenomen migracije, prožet ozbiljnom društvenom, političkom, privrednom i humanitarnom krizom, postao je jedno od dominantnih pitanja u mnogim evropskim i mediteranskim zemljama. Evropski parlament bi zbog toga želio, tokom svog predsjedavanja, pokrenuti razmišljanje koje bi mediteranskim zemljama omogućilo postizanje važnih i trajnih rezultata. Evropski parlament planira u narednom periodu predstaviti bitne teme koje će biti razmatrane tokom predsjedavanja. Sassoli čvrsto vjeruje u koncept „parlamentarne diplomatije“, te ističe da je glavni prioritet Evropskog parlamenta dovesti politiku i parlamente u središte euromediteranske rasprave. Osim toga, naglasio je da je u planu Evropskog parlamenta organiziranje vrlo važne misije u Izrael i Palestinu, kada bude povoljna situacija. Smatra da takve inicijative, povezane s političkim misijama Biroa, mogu biti prvi korak prema aktivnijim parlamentarnim dimenzijama euromediterana. Poziva sve euromediteranske zemlje da nastave raditi zajedno, uz uzajamno poštovanje i prijateljstvo, kako bi svojim građanima i mladim generacijama osigurali bolju budućnost.

Pripremila¹:

Lara Borovina,
sekretar Delegacije PSBiH u PSUzM-u

Lara

Dostaviti:

- naslovu
- Ministarstvu vanjskih poslova BiH
- a/a

¹ Uz saglasnost predsjedavajućeg Delegacije PSBiH u PSUzM-u